

<><><><><><>

JK MLA's Sworn-in

जम्मू कश्मीर विधानसभा लेई नमें चनोए दे विधायकें गी अज्ज श्रीनगर च औहद्धे दी सगंध चुकाई जाग। प्रोटेम स्पीकर मुबारक गुल होर सदन दे सब्बनें भिंबरें गी सगंध चुकाउन। शपथ ग्रैहण समारोह दिनै 2 बजे शुरू होग। 90 भिम्बरी विधानसभा च ऐकती 51 भिंबर ऐसे न जेहड़े पैहली बारी चुने गेदे न, बीजेपी दिएं 29एं ब'रें दी शगुन परिहार होरें किशतवाड़ थमां चुनांS जित्तेआ ऐ ते ओह सब्बनें शा लौहकी उमरी दिआं विधायक बनियां न जिसलै के नैशनल कांफ्रेंस दे चरार—ए—शरीफ सीट परा जित्तिथै आए दे 80एं ब'रें दे अब्दुल रहीम राथर सब्बनें शा बड्डी उमरी दे विधायक बने न। नैशनल कांफ्रेंस दे गै अली मोहम्मद सागर ते अब्दुल रहीम राथर दऊं ऐसे विधायक न जेहड़े रिकार्ड 7मीं बारी चुनांS जित्ते न। सागर होर 1983 थमां विधानसभा दे भिम्बर न जिसलै के राथर होर 1977 थमां चुनोदे आए न। 10एं ब'रे दे वक्फे परैन्त होए दे इनें विधानसभा चुनाएं च नैशनल कांफ्रेंस नै 42, बीजेपी नै 29, कांग्रेस नै 6 ते पीडीपी नै 3 सीटें पर जित्त हासल कीती ऐ। एहदे अलावा आम आदमी पार्टी नै 1 सीट, अवामी इत्तेहाद पार्टी नै बी 1, मार्क्सवादी कम्युनिस्ट पार्टी नै बी 1 ते जम्मू कश्मीर पीपल्स कांफ्रेंस नै बी 1 सीट हासल कीती जिसलै के 7 अजाद मेदवार बी इनें असैम्बली चुनाएं च जेतू घोशत कीते गे न।

<><><><><><>

Ganderbal Terror Attack

घाटी दी मशहूर सैलानी थाहर सोनामर्ग दे नेड़े गांदरबल जिले दे गगनगीर इलाके च कल आतंकवादिएं आस्सेआ इक जेरे—तामीर टन्नल आली थाहर कीती गेदी गोलीबारी च इक डाक्टर ते 6 निर्माण कम्मगारें दी मौत होई गई ऐ। इक अधिकारी नै दस्सेआ ऐ जे घटोघट्ट दऊं थेआरबंद आतंकवादी सोनामर्ग च जैड मोड़ टन्नल दे निर्माण लेई कम्म करै करदी इक प्राइवेट कंपनी दी मैस अंदर जाई बड़े ते उनें उत्थें रातीं दी रूट्टी खा करदे वकरें पर अन्नेबाह गोलियां चलाई दित्तियां। उत्थुआं नस्सने शा पैहले आतंकवादिएं बाहर

खड़ी कीती गेदे दऊं गड़िडएं गी अगग लाई दित्ती। इस हमले च मरोने आलें च बडगाम जिले दे नेदगाम ग्रां दे डाक्टर शाहनवाज बी शामिल न। मरोने आले होरनें जनें च गुरदासपुर पंजाब दे गुरमीत सिंह, बिहार दे मोहम्मद हनीफ ते कलीम, बिहार थमां गै सेपटी मैनेजर फाहीम नासिर, मध्य प्रदेश थमां मकैनिकल मैनेजर अनिल कुमार शुक्ला ते जम्मू थमां डिजाइनर शशि अबरोल शामिल न। हमले च जख्मी होए दे होरनें लोकें गी कंगन आले उपजिला अस्पताल लेता गेआ जित्थुआं गंभीर तौर पर जख्मी होए दे लोकें गी श्रीनगर दे स्किम्स अस्पतालै च दाखल करोआया गेआ।

<><><><><><>

Terror Attack Condemnation

केन्द्री गृहमंत्री अमित शाह होरें जम्मू कश्मीर दे गगनगीर च बेदोसें नागरिकें पर होए दे आतंकवादी हमले गी बुजदिलाना कारवाई करार दित्ता ऐ। सोशल मीडिया दी इक पोस्ट पर शाह होरें आखेआ ऐ जे इस बुजदिलाना हमले गी अंजाम देने आलें गी बख्शोया नेई जाग ते साढ़े सुरक्षाबलें दे जवान उनेंगी एह्दी सख्त कोला सख्त प्रतिक्रिया देउन। शाह होरें मारे गेदे लोकें दे परोआरें कन्नै हमदर्दी जतांदे होई जख्मिएं दे तौले नरोए होने दी कामना कीती। शिड़क, ट्रांसपोर्ट ते जरनैली शिड़कै दे केन्द्री मंत्री नितिन गडकरी होरें बी इस मिले दी सख्त निंदेया कीती ऐ। लेफ्टिनेंट गवर्नर मनोज सिन्हा होरें बी इस बुजदिलाना हमले दी सख्त निंदेया करदे होई एह् जकीन बी दोआया ऐ जे एह्दे च शामिल लोकें गी बख्शोआ नेई जाग। उनें आखेआ जे उनें पुलस, फौज ते सुरक्षा बलें गी पूरी खुल्ल दित्ती दी ऐ। मुख्यमंत्री ओमर अब्दुल्ला होरें बी आतंकवादिएं आसेआ कीते गेदे इस बुजदिलाना हमले दी सख्त निंदेया कीती ऐ।

<><><><><><>

URI Terrorist Killed

तोआई बारामुला जिले दे उड़ी इलाके च नियंत्रण रेखा कश छिंडे दे टाक्करे च सुरक्षाबलें भारी थेआरें कन्नै लैस इक आतंकवादी गी मारी मकाया ऐ। पुलसै जानकारी दित्ती जे इलाके च किश संदिग्ध नक्लोहरकत दिक्खे जाने परैंत सुरक्षाबलें दी इक सांझी टीम नै इलाके गी घेरियै घुसपैठ करा'रदे आतंकवादिएं गी ललकारेआ, जेह्दे पर आतंकवादिएं उंदे पर फायर खोली दित्ता। सुरक्षाबलें आसेआ कीती गेदी परते आहली कारवाई च इक आतंकवादी मारेआ गेआ जेह्दी पंछान अजें कीती जा'रदी ऐ। ऊआं टाक्करे आली थाहरै थमां इक ए.के. रफल,

ओदियां दऊं मैगजीनां, ए.के. रफल दियां 57 रौंद गोलियां, दऊं पस्तौलां, पस्तौल दियां त्रै मैगजीनां ते होर दुआ असला बरूद बरामद कीता गेआ ऐ।

<><><><><><>

PM-NDTV Summit

प्रधानमंत्री नरेन्द्र मोदी होरें आखेआ ऐ जे भारत, वैश्विक भविष्य की आकार देने च अगेत्री भूमिका निभाऽ करदा ऐ। उनें आखेआ जे स्थाड़ा देश सब्बनं खेत्तरें च ऐतिहासिक स्तरें पर अग्रे बढै करदा ऐ। इक निजी मीडिया घराने आसेआ आयोजित विश्व शिखर सम्मेलन की संबोधित करदे होई प्रधानमंत्री होरें आखेआ जे दुनिया, आर्टिफिशियल इंटेलिजेंस दे रूपै च एआई की मान्यता दिंदी ऐ, जदके भारत इक दुआ एआई यानि आकांक्षी भारत ऐ। उनें आखेआ जे जेल्लै दुनिया, यक्कोतक्की च उलझी दी ही, तदू भारत मेद दी इक लोऽ दे रूपै च उभरियै सामने आया। कोविड-19, वैश्विक अर्थबवस्था, मँहगाई, बेरोजगारी, जलवायु परिवर्तन ते जंग ज्येय मुद्दे दा जिक्र करदे होई श्री मोदी होरें आखेआ जे आलमी सतह दे हालात बी भारत की प्रभावित करदे न।

<><><><><><>

Police Commemoration Day

पुलिस स्मृति दिवस पर गृह मंत्री अमित शाह होरें अज्ज देसै लेई अपना सर्वोच्च बलिदान देने आह्ले अमर शहीदें की नमन कीता। सोशल मीडिया की इक पोस्ट राहें श्री शाह होरें आखेआ जे एह ध्याड़ा पुलिसकर्मियें ते उंदे परोआरें आसेआ राष्ट्र की सुरक्षित रखने लेई दित्ते गेदे बलिदानें दा सम्मान करने दा मौका ऐ। उनें देसै लेई उंदे आसेआ दित्ते गेदे सब्बनं बलिदानें गितै उंदा दिलै थमां आभार जताया। शाह होरें अज्ज बड्डलै नमीं दिल्ली च राष्ट्री पुलिस स्मारक पर पुष्पांजलि अर्पित कीती ते पुलिस स्मृति दिवस पर शहीदें की श्रद्धांजलि दित्ती। केन्द्री गृह राज्य मंत्री बंदी संजय कुमार, गृह सचिव गोविंद मोहन, खुफिया ब्यूरो के डरैक्टर तपन कुमार डेका ते नीम फौजी बलें दे महानिदेशकें बी राष्ट्री पुलिस स्मारक पर शहीदें की श्रद्धांजलि दित्ती। अपने सम्बोधन च शाह होरें आखेआ जे 36 ज्हार 468 पुलिसकर्मियें अपनी जिम्मेदारी निभांदे होई सर्वोच्च बलिदान दित्ता ऐ। उनें आखेआ जे

पिच्छले दहाके च वीर जवानें दे जतनें करी गै जम्मू-कश्मीर, पूर्वोत्तर ते वामपंथी उग्रवाद
थमां प्रभावित इलाकें च रमानदारी ब्हाल होई ऐ।

<><><><><><>